

KALATE PAUL A NGA TILI FILÉMÔN

Mebatan

(Kol 1 : 1, 2 ; 3 Yôh 1)

1 Ma Paul, mbôk amu Krist Yésus, bia Timôtéus mojañ, bi atitli Filémôn, nyô bi anye'e, a ébe mboésáé wongan, 2 bi atili fe Afia, kale jangan, a Arkipus, ébemone bezimbi wongan, a kirke é ne e nda jôé. 3 Mvam é bo'o e be mia, a mvo'é bi so'o e be Zambe Esaa wongan a e be Nti Yésus Krist.

Nye'an a mbunane Filémôn

(Kol 1:3-8; 2 Tim 1:3-5; 3 Yôh 2-6)

4 M'ave Zambe wom akéva kom ése éyoñ m'asimesane wo e meye'elane mam été, 5 amu m'awô'ôtan ajô ya nye'ane wôé a mbunan ô bili mfa'a Nti Yésus, a mfa'a mimfufub mise, 6 nde ete mfula'ane wôé ya mbunane a ye tindi ñyemane ya yem mbamba jam ase a ne éñwongan e be Krist. 7 Amu na, me nga bili meva'a abui a mvolane nlem amu nye'ane wôé, a mojañ, amu minlem mimfufub mi nga nyoñ amu wo.

Paul a vañ Onesimus

(1 Kor 4 : 15; 13 : 4-7; Gal 6 : 9, 10; Kol 4 : 7-9)

8 Jam ete nde, akôsabo me bili ngul abui e be Krist na, me bendé wo e jam ese w'ayiane bo, 9 ve amu nye'an, nde m'aviane vañe wo — ja'ana ma Paul, me ne éjiane njô bôt, ve éyoñe ji me ntoo mbok amu ajô Krist Yésus — 10 M'avañe wo ajô mone wom, Onesimus, nnye me ntoo ésaá e mbô'ô wom été. 11 Melu mvus, a nga too teke'e mfi e be wo, ve éyoñe ji, a ntoo mfi mfa'a wôé a mfa'a wome fe. 12 M'abulane lôme wo nye, ane nge m'alôme wo nleme wom mamien. 13 Mamien me nga ye kômbô bi nye va, na a volô ma e señe jôé nté me ne mimbôk amu mbamba foé. 14 Ve , nté me nji yem ôsimesane viôé, me nji kômbô bo jam éziñ été, amu na, mvaé jôé é za bo ane ntindan, ve ane nyô ya nkômbane wôé womien. 15 Amu ndô'ôtô a nga kôlô e be wo nté éziñ ve amu ajô ete, nde w'aye bi nye nnôm éto ; 16 sa fe ane ôlo, ve ane nyô a dañeya nkôñ ôlo, ane mojañ bi anye'e, mimfa'a mibaé, e minsôn a e be Nti.

17 Ajô ete, nge w'alañe ma ane mvôé jôé, nyoñe nye aval ane ô nga ye nyoñe ma. 18 Nge a nga bo wo ékotekot éziñ, nge bi wo mvôla éziñ, lañe jam ete mfa'a wom. 19 Ma Paul, m'atili de a wo wom mamiene na, ma m'aye ya'ane je. Nalé m'aye bo te jô na, womien ô bili ma mvôla ôsu ; 20 Yaa, A mojañ, m'akômbô nsenge éziñ ô so'o ma mfa'a wôé e be Nti. Volô'ô me nlem e be Krist.

21 Amu me ntoo ndinlem a mewô'ô môé, nde m'atili wo, me yeme na, w'aye bo adañ abim m'ajô. 22 Ve éyoñ éte kôme ma étune nda beyeñ, amu me too ndinleme na, amu meye'elane menan, me ne veban e be mia.

Mebatan m'asu'ulan

23 Epafra, nyô a ne ébe mbô'ô wom e be krist Yésus, a sili wo ; 24 nalé fe Markus, a Aristarkus, a Démas, a Lukas, ba be ne beébe bebobisaé, be sili'i wo. 25 Mvam Nti Yésus Krist é bo'o be minsisime mienan.



Rev. Matthias MEYE
Secrétaire Général 1961.....